

SESSIONE URDINARIA DI U 16 NUVEMBRE DI U 2022

N° 2022 /M3/42

QUISTIONE URALE DIPUSITATA DA SAMIR BECHERIGUI

Ughjettu : L'avvene di a Corsica.

Sgiò Presidente di l'Esecutivu,

Cum'è Luther King, aghju un sognu...

Quellu di vede un ghjornu a ghjuventù d'oghje, cù i so figlioli è arcifigliulini campà in la so terra di Cursichella.

Quellu di vede li cumunicà in lingua nostra.

Quellu di vede li praticà e so tradizione.

Quellu di vede li cumprà una casa.

Quellu di vede li travaglià in la so terra.

Quellu di vede li campà in un paese liberu.

Quellu di vede li campà sanu.

Ma u culunialismu fà chì oghje u populu corsu campa in tensione. Tra difficoltà finanziare pè manghjà o cumprà una casa, ma ancu pè amparà a so lingua è a so storia à scola.

Alora, voi, cum'è tant'altri prima di noi, avete pigliatu a strada di u movimentu naziunale. Sessant'anni di lotta pè vede un ghjornu `ssu sognu esse realtà, ma ancu sessant'anni pè vede u movimentu naziunale ghjunghe à u pudè. Ma a lotta ùn hè micca compia. C'è sempre una ghjuventù ch'aspetta 'ssu ghjornu, c'è sempre un populu ch'aspetta 'ssu ghjornu.

Ricurdate vi bè, quandu simu ghjunti à u pudè in 2015, a ghjuventù era digià in carrughju suniendu à `ssu ghjornu. Ma voi Eletti, avete chjamatu à calà e mubilizzazione pè discutà cù u Statu, sperendu chì a demucrazia ci permetterà di fà sbuccià `ssu ghjornu. Ma un pruverbiu famosu dice chì “Quellu chì campa sperendu more cachendu”. Alora chì femu ?

A ghjuventù hè falata torna una volta in carrughju dopu à l'assassiniu d'Yvan Colonna pè dumanda ghjustizia è verità per ellu, ma ancu pè di “basta” à u Guvernu francese. A liberazione di i prigiuneri pulitichi è a ricunscenza di u populu corsu sò duie rivendicazione chì anu un sensu tamantu pè tutti i militanti di u movimentu naziunale. Alora chì femu pè purtà le ?

A ghjuventù, torna una volta, a mustratu ch'ella hè pronta à mette in periculu a so vita pè 'sse rivendicazione. Alora a mio dumanda hè semplice. Sapendu chì u tempu face prò à u Statu, colpa à u fattu chì a nostra cultura si ne more è à u culunialisazione di populamentu : d'una manera pacifica è per via di l'istituzione, chì pudemu fà pè fà sbuccià u più prestu pussibile una soluzione pè vede `ssu ghjornu suniatu da tutti ?